

AGUSTIN DEUNAREN ETA GURE ORIXEREN GOMUTAZ

Aurten dira milla ta seireun urte Agustin deuna Kristoren artalderatu zala, eta aurten ogetabost urte Orixe euskal-idazlea, eleiz-guraso eta santu andi orren libururik ospe andienetakoaren euskeratzallea, il zala. Bion izenak zabal dabiltz aurten, Agustini orrena mundu guztian, eta gure Orixe-rena, gure mundutxo txikiagoan. Biok batean gogoratu nai geunkez lerro oneitan.

Agustin deunaren amaseigarren eun-urtea

Eta lenengo ta bein, Agustin deunaren urte-urrena. Amasei eun-urte joan dira santu ta jakitun andi onek bere biotz andia eta jakituri andia Kristoren menpean jarri zituela. Gure urte kontraeratik, Kristo jaio zan ezkeroko 386garrenean izan zan. Bere buru ta biotzagaz burruka latza erabillita gero, bere baietz osoa emon eutsan Kristori orduan. Kristogan aurkitu eban bere gogoarentzat argi betea eta bere biotzarentzat betiko bakca ta osasuna. Andik aurrera Kristorentzat izango da Agustini izate osoa, eta arrezkero gizonak, lagun urkoa, kristogana eta Eleizearen magalera ekarte izango dira Agustini ardua eta nekeak. Zelan? Bere otoitz, berba, joan-etorri eta idazlanen bitartez.

Eta idazlanetan bat, osperik andiena emongo eutsana, eta gaur be emoten deusana, ain zuzen bere Kristoganako bidea autortu eta azaltzen deuskuna, *Confessiones* izenekoa, andik amalau bat urte geroago idatziko ebana. Inongo literaturan lenen-

goz idatzi izan dan norbere barrua ustu ta agirian ipinteko liburu sakonena eta egiazkoena. Liburu orretan agirian ipinten deutso egilleak bere barrua, ez edozeini, Jaungoikoari berari. Or autortzen deutsoz Jaungoikoari (eta ez Jaungoikoa jakitun ipintearren, Jaungoikoa dana dakiana da-ta), artean egin dituan pekatuak, eta Jaungoikoari zor deutzazan mesede ta ontasunak.

Autorkizunak (Confessiones) zer diran

Esan dogu: nork bere barrua agirian ipiñi eta ustuten jakin eta ekin deutsoen idazleen artean, Agustin izan da mundu guztian, era batera, lenengoa eta gorengo maillak jo dituen; inork eztau bere barruan barrurago eta sakonago aztertzen eta zintzoago autortzen jakin izan. Gure egunotan zabal dabil idazleen artean zeñiek bere bizitzako jazoerak eta gogoetak eralteko oiturea. Bakotxak bere buruaz dauan eritxi ta irudia saldu gura dauskue, edo ta euren barru lorriña ez deuskue gitxitan azaltzen. Sarriegi, egiak barik, guzurak eta abarrak dauke olango liburuetan lekurik andiena. Irakurleen aurrean euren buruak erakusteko edo zuritzeko idatziak dira geienetan. Agustiñek guztizko begirunea deutso egiari. Idatzi be eztau idatzi irakurleari bere barrua azaltzeko, irakur



*San Agustin eta bere ama, Santa Monica
Ary Scheffer'ek egina (Louvre)*

lea aurrean baleuko lez; Jaungoikoaren aurrean diardu, Jaungoikoari berba egiñez, guztia dakianaren eta guztia dakusanaren aurrean bere barrua ustutzen dauala. Ari guzurrik esaterik edo

ezer estaltzerik ez daukala ondo jakinik. Eta iñoz be ez, iñoren aurrean bere burua andiago egiteko, eta gitxiago Jaungoikoaren aurrean. Otrenbesterañño daroa Agustiñek bere zintzotasuna eta egiari deutzan begirunea. Idazleen artean bear bada ezta iñoz agertu Agustin baiño egi zaleagorik edo egian ibilteko gogo andiagorik.

Eta zer geiago dira Agustiñen *Autorkizunok*? Berba au be ez daigun oker ulertu. Agustiñen berbetan autortzeak ez deusku beti pekatuen gomutea ekarri bear gogora. Pekatuak autortzea baiño geiago Jaungoikoari gorantzak emon eta esker ona erakustea geiago da darabillan asmoa. Ebanjelioan eta salmoetan be itz orrek orixe esan nai dau askotan; Jaungoikoa bedeinkatzea, Jaungoiko eskerrak emotea. Autortze au bitarikoa dala askotan irakatsi dau Agustiñek: bata pekatuak Jaungoikoaren aurrean autortzekoa, eta bestea, Jaunaren anditasuna eta ontasuna, Jaunaren eskutik datorriguzan argitasun eta mesedeak eskertzekoa. Bigarren asmo ori geiago darabil santu onen bere liburu onetan, asi-asieran diñozkunez: «Zetako aitatzen deutzudaz ainbeste gauza? Nire bitartez jakin dagizuzan? Ez, orixe. Nire berbokaz nire zuzanako maitasuna berotu nai dot, guztiak batera esan dagien: «Andi zara, Jauna, eta ezin goragarriago». Pekatuen autortza be egiten dau, baiña esker ona eta goramenezko itza geiago dario beste ezer baiño; Orregaitik liburu osoa esker onezko eta goramenezko berbakaz egiña dau.

Agustiñen Kristoganako bidea

Goazen arira, liburuaren muiñera. Kristoganañño Agustiñek eroan dauan bidea luzetxoa izan da, ogeta amabi urteko bidea luzetxoa. Umetan ia kristiñau egin zana, gero, kristiñauen fedetik eta bizitzatik urrin ibilliko da. Kristoren izena besterik eztau gorde bere gaztetako urteetan. Jarraitu deigun bide luze orretan; Afrikatik Erromarañño, Erromatik Milanerañño.

Agustin Tagasten (gaurko Suk-Ahras-en jaioa da, 354 garrren urtean, Afrikarra da, beraz, afrikarra jaiotzez eta odolez. Aspalditik Erromarren menpe jausi zan eta Erromarren izkuntzari